



Direktoratet for mineralforvaltning
med Bergmeisteren for Svalbard

Adresseinformasjon fylles inn ved ekspedering.
Se mottakerliste nedenfor.

Dato: 13.06.2018
Vår ref: 17/00687-17
Deres ref:

Tildeling av driftskonsesjon etter minerallova for Hestamoen i Forsand kommune. Tiltakshavar: Forsand Sandkompani AS.

Leiv Erikssons vei 39
Postboks 3021 Lade
N-7441 Trondheim

TELEFON + 47 73 90 46 00

E-POST mail@dirmin.no

WEB www.dirmin.no

GIRO 7694.05.05883

SWIFT DNBANOKK

IBAN NO5376940505883

ORG.NR. NO 974 760 282

SVALBARDKONTOR

TELEFON +47 79 02 12 92

Direktoratet for mineralforvaltning med Bergmeisteren for Svalbard (DMF) viser til søknad om driftskonsesjon datert 3. april 2017 frå Forsand Sandkompani AS, org. nr. 917 589 917.

1. Tildeling av driftskonsesjon

Forsand Sandkompani AS, org. nr. 917 589 917, heretter kalla «Tiltakshavar» eller «Tiltakshavaren», får med dette driftskonsesjon etter minerallova § 43.

Tiltakshavaren får driftskonsesjon for uttak av grus/sand i Hestamoen på del av eigedomane gbnr. 37/1, 37/2, 37/3, 37/5, 37/8, 37/17, 37/20, 37/62, 37/173 (Fv. 491), 37/221, 40/1, 40/5 og 40/10 (deler av gbnr. 37/2 og deler av 37/8 er blitt skilt ut til ein eigedom med nytt gbnr. 37/281) i Forsand kommune. Mineralførekomsten høyrer til kategorien mineral som grunneigarane eig.

Konsesjonsområdet har eit areal på kring 130 daa og går fram av kart med tittel «Konsesjoinsområde Hestamoen i Forsand kommune», produsert ved DMF 31. januar 2018.

Etter reguleringsplan «Detaljregulering for Hestamoen Forsand kommune» med plannr. 291401 (stadfesta av kommunestyret etter mekling den 15. mai 2016), samt «Detaljregulering for Bergekrossen FV13/FV491» med plannr. 201601 (vedteken den 15. juni 2017), er området regulert til masseuttak og råstoffutvinning.

Tildeling av driftskonsesjon erstattar ikkje krav om andre løyve, godkjenning, arealavklaring eller konsesjon etter anna lovgiving. Tiltakshavaren er ansvarleg for å innhente andre nødvendige løyve.

2. Vilkår for driftskonsesjonen

Konsesjonen blir gjeven på desse vilkåra:



2.1. Driftsplan

Drifta skal til ei kvar tid gå føre seg i samsvar med ein driftsplan godkjend av DMF.

Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.

DMF kan krevje ny oppmåling og at ajourførte kart og profilar skal sendast inn når DMF finn det nødvendig.

2.2. Økonomisk sikkerheit

Tiltakshavaren blir pålagt å stille økonomisk sikkerheit med NOK 470 000, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 150 000, og deretter årlege avsetjingar til ein bankkonto som det skal etablerast pant i til fordel for DMF slik at Tiltakshavaren ikkje kan råde over kontoen på noko vis, begge deler som skildra i punkt 5.11.

Før drifta startar skal Tiltakshavaren ha:

- (i) inngått ein avtale om finansiell sikkerheit med DMF,
- (ii) lagt fram påkravsgaranti frå bank som DMF vurderer som tilfredstillande;
- (iii) etablert pantet til fordel for DMF, jf. pantelova §§ 4-4 til 4-6.

2.3. Bergteknisk ansvarleg

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

2.4. Andre vilkår

- Den regulerte føremålsgrensa for massetaket skal setjast ut eller markerast i terrenget på ein slik måte at den er lett synleg gjennom heile driftsperioden.
- Tiltakshavaren må sjå til at dei ved avdekking og mellomlagring av toppmasse må destruere det dei finn av raudhyll

DMF gjer merksam på at ein driftskonsesjon gjeven etter minerallova ikkje erstattar krav om løyve, godkjenning, arealplan eller konsesjon etter anna lovgjeving.

3. Godkjenning av driftsplan

DMF godkjenner driftsplanen for Hestamoen. Den godkjende versjonen av driftsplanen ligg ved dette konsesjonsvedtaket.

4. Høyringsfråsegner med kommentarar frå DMF

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Fylkesmannen i Rogaland, Forsand kommune, Rogaland fylkeskommune, Statens vegvesen region vest, NVE region vest, Forsand elverk kommunalt føretak, Statnett SF samt elles dei som framkjem av adresselista til høyringsbrevet og dette tildelingsbrevet.



Høringsperioden var frå 2. februar 2018 til 2. mars 2018.

Frå høyringsfråsegnene har DMF særleg merkt seg dette:

Statens vegvesen Region vest:

Statens vegvesen hadde inga vesentlege merknader til driftskonsesjonssøknaden.

DMF sine kommentarar:

DMF har teke høyringsinnspellet til etterretning.

Fylkesmannen i Rogaland:

Når det gjeld forureining syner fylkesmannen til at uttaksmassane transporterast til tiltakshavarens produksjonsanlegg ved sjøen. Dette inneber at utslipp av støy er noko mindre enn frå ordinær drift av pukkverk. I tillegg skriv fylkesmannen at massane er naturleg fuktige, noko som betyr at også utslipp av støv vil vere noko lågare enn normalt for masseuttak. Fylkesmannen er heller ikkje kjend med at det har vore klagar på støv og støy frå naboar til masseuttaket. Vidare syner fylkesmannen til reguleringsføresegnene § 2, og har vurdert vilkåra å vere fullt ut dekkjande og i samsvar med vilkåra i forureiningsforskrifta kap. 30.

Fylkesmannen har også handsama naturmangfald i sitt høyringsinnspel. For å førebygge spreining av raudhyll har dei kome med ei tilråding om at tiltakshavaren må sjå til at dei ved avdekking og mellomlagring av toppmasse må destruere det dei finn av raudhyll. Vidare peiker fylkesmannen på at dersom tiltakshavaren finn eldre eksemplarar av ask, bør dei så langt som mogleg beskyttast mot skade som fylgje av drifta.

Fylkesmannen i Rogaland tilrår at driftskonsesjonen blir innvilga. Dei hadde inga merknader til innhaldet i driftsplanen, men oppmodar DMF om å vurdere at tiltak mot spreining av framande arter bør inkluderast i driftsplanen.

DMF sine kommentarar:

DMF har teke høyringsinnspellet til etterretning. Når det gjeld omsynet til handtering av toppmassar for å hindre spreining av raudhyll, viser DMF til punkt 2.4 i vedtaket.

Rogaland fylkeskommune:

Fylkeskommunen syner til at det er seks registrerte kulturminnelokalitetar innafor området for masseuttak. Dei registrerte kulturminna er ikkje automatisk freda kulturminne. Fylkeskommunen syner til at kulturminnelokalitetane har vernestatus som «ikkje freda». Fylkesrådmannen hadde difor inga merknader til konsesjonssøknad om masseuttak på Hestamoen.

DMF sine kommentarar:

DMF har teke høyringsinnspellet til etterretning.

Bjørn Hansen AS:

Bjørn Hansen AS har inga merknader til saka, men ynskjer å framheve at dei er ei bedrift med 100 tilsette og at dei er heilt avhengige av å få kjøpt masser frå Forsand Sandkompani AS.



DMF sine kommentarar:

DMF har teke høyringsinnspelet til etterretning.

5. Korleis DMF vurderer søknaden om driftskonsesjon

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekomstar på meir enn 10 000 m³ masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønsmessig prøving før det blir avgjort om det skal gjevast driftskonsesjon. I vurderinga av om det skal gjevast driftskonsesjon skal det leggjast vekt på om søkjaren er "skikka" til å utvinne førekomsten. Dette inneber at ein skal leggje vekt på om prosjektet ser ut til å vere økonomisk gjennomførbart, om det blir lagt opp til bergfagleg forsvarleg drift, og om søkjaren har tilstrekkeleg kompetanse til å drive førekomsten. I vurderinga av om det skal gjevast driftskonsesjon skal det òg leggjast vekt på omsyna som er nemnde i minerallova § 2.

DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevast konsesjon.

DMF har vurdert konsesjonssøknaden slik:

5.1 Utvinningsrett

Mineralførekomsten som skal utvinnast tilhøyrer kategorien mineral som grunneigaren eig. Tiltakshavaren er ikkje grunneigar for konsesjonsområdet, og det blir difor kravd avtale med grunneigaren om utvinningsretten til førekomsten. Tiltakshavaren har i søknadsprosessen lagt fram ein avtale/avtalar med grunneigaren/grunneigarane for 37/1, 37/2, 37/3, 37/5, 37/8, 37/17, 37/20, 37/62, 37/173 (Fv. 491), 37/221, 40/1, 40/5, 40/10 (deler av gbnr. 37/2 og deler av 37/8 er blitt skilt ut til ein eigedom med nytt gbnr. 37/281), som dokumentasjon for utvinningsrett.

Avtalane gjev Tiltakshavaren utvinningsrett til førekomsten på det området det er søkt om konsesjon for i avtaleperioden.

Etter DMF si vurdering har Tiltakshavaren utvinningsretten til førekomsten.

5.2 Arealstatus for tiltaket

Konsesjonsområdet har eit areal på kring 130 daa og går fram av kart med tittel «Konsesjonsområde Hestamoen i Forsand kommune», produsert ved DMF 31. januar 2018.

Etter reguleringsplan «Detaljregulering for Hestamoen Forsand kommune» med plannr. 291401 (stadfesta av kommunestyret etter mekling den 15. mai 2016), samt «Detaljregulering for Bergekrossen FV13/FV491» med plannr. 201601 (vedteken den 15. juni 2017), er området regulert til masseuttak og råstoffutvinning.



5.3 Økonomien i prosjektet

DMF har vurdert den vedlagde informasjonen om økonomien i prosjektet. Etter DMF si vurdering er prosjektet økonomisk gjennomførbart.

5.4 Driftsplan

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

I samband med søknaden har Tiltakshavaren lagt fram eit framlegg til driftsplan for uttaket.

Framlegget til driftsplan omfattar heile driftsperioden og avsluttinga av grustaket. Skildringa og kart- og snitteikningar presenterer det planlagde uttaket av føre komsten innanfor arealet på om lag 130 dekar regulert til føremålet. Det totale volumet grusreservar som skal takast ut er estimert til kring 1 290 000 m³. Det årlege uttaket vil variere med marknaden, men det planlagde uttaket per år er 140 000 m³. Det er planlagt drift i 2 etappar. Utdrivne område som ikkje trengst i den vidare drifta, skal setjast i stand fortløpande. I tillegg til driftsfasane skal det leggast fram ein plan for sikring og avslutting av grustaket.

Etter DMF si vurdering kan den vedlagde versjonen av driftsplan for Hestamoen godkjennast. Ein finn at planen tilfredsstillar dei krava som DMF stiller til driftsplanar, og etter DMF si vurdering legg planen opp til bergfagleg forsvarleg drift.

Dersom det under drifta oppstår nye situasjonar eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.

Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

5.5 Bergfagleg forsvarleg drift

Kravet om at drifta til ei kvar tid skal gå føre seg på ein bergfagleg forsvarleg måte inneber at aktiviteten må vere i samsvar med tilfredsstillande faglege standardar for denne typen verksemd.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.



5.6. Søkjaren sin kompetanse for drift av førekomsten

I vurderinga av om søkjaren har tilstrekkeleg kompetanse er det den totale kompetansen som søkjaren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.

Tiltakshavaren har i søknaden gjeve opp Rune som bergteknisk ansvarleg for uttaket. Personen er registrert hos DMF som bergteknisk ansvarleg for uttaket og oppfyller kvalifikasjonskrava i forskrifta.

Tiltakshavaren har, ifylgje driftsplanen, drive masseuttak sidan starten av 60-talet. Bedrifta består av om lag 20 tilsette. Ifylgje tiltakshavar er dei fleste i selskapet engasjert med mottak og foredling. Tiltakshavar beskriv at dei leverar sand og singel til betongproduksjon over store deler av landet.

Etter DMF si vurdering har Tiltakshavaren tilstrekkeleg kompetanse til å drive førekomsten.

Etter DMF si vurdering vil Tiltakshavaren ha tilstrekkeleg kompetanse for å drive førekomsten når ein bergteknisk ansvarleg for uttaket med dei nødvendige kvalifikasjonane er på plass.

5.7. Dei miljømessige konsekvensane av utvinning

I vurderinga av om det skal gjevast driftskonsesjon skal det leggast vekt på omsynet til miljøet og kulturminne.

Det finst ein godkjend reguleringsplan for uttaket. I samband med planprosessen er det gjennomført ei konsekvensutgreiing som skildrar miljøverdiar i området og gjer greie for kva konsekvensar uttaket vil ha for miljøet.

Vurdering etter naturmangfaldlova

Naturmangfaldlova § 7 pålegg alle offentlege instansar som tek avgjerder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Reguleringsplanen, høyringsfråsegner og eigne søk i Naturbase og Artskart gjennomførte i februar 2018 er lagde til grunn for vurderingane etter naturmangfaldlova i DMF si handsaming av søknaden. Det er ikkje kome fram opplysningar i vurderingsgrunnlaget som tyder på at uttaket vil kome i konflikt med naturverdiar i området. DMF reknar kunnskapskravet i naturmangfaldlova § 8 for oppfylt. Sidan uttaket ikkje vil ha nokon større verknad på naturmangfaldet og ein ikkje kan påvise at tiltaket vil påverke truga, nær truga eller verdifull natur, legg DMF til grunn at det ikkje er nødvendig å gjere vidare vurderingar etter miljøprinsippa i naturmangfaldlova §§ 9–12.

Avrenning

Det går fram av planutgreiinga at botnen i uttaksområdet vil ligge på kote 25-26, noko som svarar til dagens uttaksområde sør for Fv. 491. Tiltakshavaren skal legge opp til at ferdig terreng vil skråne svakt mot nord med fall 1:100 for å sikre kontrollert avrenning



frå området. I tillegg følger det av planutgreiinga at bekkane frå område rundt uttaksområdet skal leggjast langs kanten av området og ut til Fossanána, alternativt bekk mot Hagavika.

Konsekvensar av tiltaket for kulturminner

Kulturminne er handsama som eit eige tema i planutgreiinga. DMF støttar seg til dei vurderingane som bleigjorde i samband med reguleringsplanarbeidet, og meiner at omsynet til kulturminne er sikra. Vi viser også til Rogaland fylkeskommune si uttale til konsesjonssøknaden (punkt 4 i vedtaket). DMF minner likevel om den generelle varslingsplikta etter kulturminnelova § 8.

På bakgrunn av det som er omtala ovanfor har DMF kome til at det ikkje finst faktorar knytte til miljø og kulturminne som tilseier at det ikkje skal gjevast driftskonsesjon eller at det er nødvendig å setje vilkår om avbøtande tiltak.

5.8. Tilhøvet til omgjevnadene og dei nærliggjande områda under drift

Mineralressursane skal forvaltast og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr. Vi har merkt oss desse moglege negative konsekvensane:

Landskap

Tiltaket på Hestamoen vil innebere ei permanent og stor endring av landskapsbilete lokalt, med tanke på busetjing og ferdsel. Det er i planutgreiinga skildra en rekke avbøtande tiltak som fylgjast opp i samband med istandsetjing av området.

Støyfrå vegtrafikk

I samband med planutgreiinga blei det utarbeidd en egen fagrappport med støy som tema. Det er gjennomført berekningar av støysituasjonen i dei ulike delane av masseuttaket. Utgangspunktet er likevel at tiltakshavar skal overhalde grenseverdiane som framkjem av forureiningsforskrifta.

Støv

Kor mykje tiltaket vil støve, er avhengig av mellom anna uttaksprosessane ved brotkanten, fragmentering av massane som takast ut, størrelsen på uttaksarealet samt transport. I tillegg vil vind og nedbør ha noko å si for kor mykje uttaket vil støve.

Det ble i samband med planutgreiinga utarbeidd ei eiga vurdering av behov for avbøtande tiltak knytt til omlegging av Fv. 491 og masseuttaket.

DMF har kome til at dette ikkje er avgjerande moment som talar mot å innvilge konsesjon.

5.9. Kva tiltaket vil ha å seie for verdiskaping og næringsutvikling

Førekosten det er søkt om driftskonsesjon for fell inn under råstoffgrupperinga: sand, grus, pukk og leire (byggjeråstoff). Råstoffet blir brukt i produkt som det moderne samfunnet er heilt avhengig av og som blir brukte i bygg, vegar og anlegg.

Uttaket sysselset fleire tilsette og vil bidra til å halde oppe sysselsetjinga/skape ny sysselsetjing i lokalsamfunnet. Drifta kan òg ha ein positiv verknad ved å gje opphav til



eller sikre eksistensen til anna næringsverksemd, eller ved at råstoffet kan vere ein strategisk innsatsfaktor i anna verksemd.

5.10. Langsiktig planlegging for etterbruk eller tilbakeføring av området

Uttaksområdet skal tilbakestillast til landbruksføremål etter avslutta drift. Delområda vil bli tilbakeført undervegs i drifta. Ifylgje driftsplanen skal skråningar såast og plantast med stedefegen vegetasjon. Tiltakshavar planlegg at skråningane skal sikrast mot avrenning, samt at skråningane skal etablerast i tråd med reguleringsplan med eit fall på 1:2. I tillegg skal eventuelt overvatn frå området ledast vekk med naturleg fall samt at området elles vil bli planert med naudsynt avrenning der fallet skal ha 1:100. Planting av skråningane vil skje

Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

5.11 Økonomisk sikkerheit

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelege krava til sikkerheit.

Tiltakshavaren har presentert eit forslag om å stille til rådighet eit beløp på NOK 420 000,- som økonomisk sikkerheit for sikring og opprydding etter minerallova §§ 49 og 50. Dei ser for seg at heile beløpet skal stillast til rådighet som ein bankgaranti i form av påkravgaranti for heile driftsperioden. Tiltakshavaren vil ikkje at det skal bereknast ein bestemt avsetningsperiode, men at heile beløpet skal garanterast for i heile driftsperioden.

5.11.1. Pålegg om å stille økonomisk sikkerheit og vurdering av kor stor sikkerheita skal vere

Etter DMF si vurdering er Tiltakshavaren sitt framlegg til kor stor sikkerheita skal vere ikkje tilfredsstillande. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

Tiltakshavaren har foreslått at den økonomiske sikkerheita skal stillast i form av ein bankgaranti (påkravgaranti) for heile beløpet i heile perioden. Ifylgje tiltakshavaren sine eigne utgreiingar, vil uttaket skje over om lag 9-10 år før det er ferdig uttatt. I samband med dette viser DMF til vår rettleiar om økonomisk sikkerheit punkt 6.2 kor det kjem fram at bankgaranti som einaste form for sikkerheit berre nyttast i tilfelle der verksemda ser for seg kortsiktig drift. I og med at drifta av Hestamoen er anslått å skulle vare i 9-10 år, har DMF kome til at bankgaranti åleine ikkje er tilstrekkeleg.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 470 000 for å sikre at naudsynte sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på: Kor komplekst uttaket er, massetype, potensiell forureiningsfare, underjords- eller



dagbrotsdrift, plassering og lokale tilhøve. DMF har òg lagt vekt på sine egne erfaringstal for tilsvarande uttak, med tillegg for eksterne og uventa kostnader

5.11.2. Form for sikkerheit

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.

Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.

Bankgaranti–oppstartsfase

DMF vurderer det som naudsynt at Tiltakshavaren, før drifta startar, stiller ein bankgaranti som DMF vurderer som tilfredstillande som påkravgaranti for eit beløp på NOK 150 000. Dette er naudsynt for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre naudsynte sikrings- og oppryddingstiltak som DMF godtek;
- (ii) Ved konkurs, opphøyr eller anna avvikling av Tiltakshavaren si verksemd; og
- (iii) Dersom konsesjonen blir trekt attende.

Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldande etter bankgarantien, utan omsyn til motsegner frå Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 150 000. Når beløpet på bankkontoen har nådd NOK 150 000, eller tidlegare etter skriftleg samtykkje frå DMF, fell plikta til bankgaranti bort.

Individuell avsetjing, avsetjingsperiode og storleiken på avsetjinga

Deretter skal Tiltakshavaren setje inn midlar på bankkontoen årleg fram til totalbeløpet på NOK 470 000 er nådd. Dei årlege innskota blir rekna ut etterskotsvis på grunnlag av masseuttaket året før. Det skal betalast inn NOK 0,24 årleg per tonn utteken masse.

Ved fastsetjinga av satsen per tonn utteken masse har DMF lagt til grunn at fondet skal byggjast opp over ein periode på i underkant av 8 år, det vil seie NOK 60 000 per år. I søknaden er det rekna med eit uttak på 250 000 tonn/år, noko som gjev ei årleg avsetjing på NOK 0,24 per tonn.

Innbetalinga for masseuttaket må vere avsett innan 1. februar året etter.



5.11.3. Rapportering og dokumentasjon

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivast kontoen.

I tillegg finn DMF det naudsynt at Tiltakshavaren undervegs i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette driftsperioden for uttaket blir endra eller det skjer andre vesentlege endringar i driftsplanen, skal DMF informerast straks. Elles skal tiltakshavaren kvart femte år gjere ei ny vurdering av om sikkerheita er tilstrekkeleg. Når vurderinga er gjord, skal tiltakshavaren utarbeide ein rapport og sende den til DMF utan grunnlaust opphald.

DMF kan òg ha behov for meir rapportering og dokumentering enn det som er skildra over, og finn det difor naudsynt å påleggje Tiltakshavaren plikter i så måte i konsesjonsvilkåra.

5.11.4. Justering av sikkerheita

Etter forskrift til minerallova § 2-2 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå Tiltakshavaren, og tidspunktet for innbetaling. Slike endringar kan òg gjerast når som helst ved endringar i minerallova og andre relevante lover, forskrifter og vedtak.

6. Kor lenge driftskonsesjonen gjeld

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell òg bort dersom:

- utvinningsretten for statens mineral blir sletta
- avtalen om rett til å utnytte førekomst av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikkje overdragast. Det gjeld òg ved overdraging av utvinningsretten.

7. Plikter for tiltakshavaren

Tiltakshavaren har rettar og plikter som følgjer av minerallova med forskrifter.

Meldeplikt ved oppstart og stans av drift

Seinast éi veke før oppstart av drifta skal tiltakshavaren sende melding til DMF. Tiltakshavaren skal òg sende melding til DMF før drifta mellombels blir stansa eller lagd ned i medhald av minerallova § 44.



Drifta skal utførast med varsemd

Drifta skal utførast med varsemd, slik at skadane ikkje blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.

Forsvarleg sikring og opprydding

Området skal sikrast slik at arbeidet ikkje medfører fare for menneske, husdyr eller tamrein. Etter minerallova § 49 omfattar sikringsplikta òg gruveopningar, tippar og utlagde massar på område som er knytte til konsesjonsområdet.

Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

Ansvarlet til bergteknisk ansvarleg

Bergteknisk ansvarleg har eit særskilt ansvar for å sjå til

- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekomsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

Rapportering

Tiltakshavaren skal sende årleg driftsrapport til DMF via «Min side» på dirmin.no.

Når uttak av grunneigars mineral blir lagt ned, kan DMF stille krav om å sende inn sluttrapport, måledata og prøvemateriale. Dette gjeld dersom uttaket har mineraliseringar av vesentleg geologisk interesse.

8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.

Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikkje finn grunn til å gjere om vedtaket, sender vi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringar.

Etter forvaltingslova § 18 og 19 har partane i saka rett til å sjå saksdokumenta.

For nærmare informasjon om minerallova med tilhøyrande forskrifter, sjå heimesida vår på www.dirmin.no.

Med helsing

Maria Lauritzen
seksjonsleiar

Stine Borge Nordskog
rådgjevar

Dokumentet er elektronisk signert og har difor ikkje handskrivne signaturar.



Sakshandsamar: Stine Borge Nordskog

Vedlegg:

Avtale om finansiell sikkerhetsstillelse_Hestamoen.docx

Pantsettelseserklæring for enkle pengekrav_Hestamoen.docx

Påkravsgaranti_Hestamoen.docx

Godkjent driftsplan_Hestamoen.pdf

Konsesjonsområde_Hestamoen.pdf

Adresseliste_Hestamoen.pdf

Mottakere:

Forsand Sandkompani AS

Fossanvegen 402

4110 FORSAND

Kopi til:

Adresseliste